

## **Peruntukan RM44 juta, UNISEL-KUIS sedia realisasi agenda pendidikan**

**October 31, 2016**

**OLEH ERMIZI MUHAMAD (<https://selangorkini.my/2016/10/peruntukan-rm44-juta-unisel-kuis-sedia-realisasi-agenda-pendidikan-negeri/>)**

SHAH ALAM, 31 OKT : Universiti Selangor (UNISEL) dan Kolej Universiti Islam Selangor (KUIS) kini bersiap siaga menggarap cabaran baru dan lebih berdaya saing menyumbang kepada agenda pendidikan negeri.

Dato' Menteri Besar, Dato' Seri Mohamed Azmin Ali berkata, Kerajaan Negeri menyalurkan peruntukan sejumlah RM 44 juta bagi tujuan merealisasikan visi tersebut.

Beliau berkata, jumlah tersebut meliputi beberapa program pelaksanaan di peringkat institusi pendidikan milik Kerajaan Negeri itu.

“Program Tajaan Yuran Percuma bagi tahun asas di UNISEL telah menghasilkan kejayaan di mana seramai 211 pelajar dapat menikmati kemudahan ini.

“Dijangka jumlah pelajar akan meningkat kepada 1,000 pelajar pada 2017.

“Tambahan kepada usaha ini, Kerajaan Negeri bersetuju memperuntukkan RM8 juta untuk menaiktaraf infrastruktur dan kemudahan pembelajaran di Kolej Universiti Islam Selangor (KUIS),” katanya.

Mohamed Azmin berkata demikian ketika membentangkan Belanjawan Negeri 2017 di Dewan Negeri (DNS) di sini, pagi ini.

Pada masa sama, pendidikan vokasional turut diperksakana menerusi cadangan peruntukan sebanyak RM5 juta untuk program latihan teknikal dan vokasional (TVET) di Kolej Antarabangsa INPENS.

“Untuk memperkasa pendidikan vokasional yang akan membekalkan tenaga mahir kepada industri, Kerajaan Negeri mencadangkan sejumlah RM 5 juta untuk program latihan teknikal dan vokasional (TVET) di Kolej Antarabangsa INPENS,” katanya.